

四庫全書

經部

欽定四庫全書

經部

詩傳旁通卷十二至十五

詳校官監察御史臣盛嘉祐

通政使司副使臣莫瞻菴覆勘

總校官進士臣楊懋珩

校對官中書臣吳甸華

謄錄舉人臣張曾秀

欽定四庫全書

詩傳旁通卷十二

元 梁益 撰

大雅蕩之什

蕩

受中

左傳成公十二年劉子曰民受天地之中以生所謂
命也是有動作禮義威儀之則以定命也能者養
之以福不能者敗以取禍福劉子劉康公畿內諸侯

為王朝卿士劉邑在河南緱氏杜元凱云緱氏西北
舊有亭許氏說文無劉字故作鎬與璽今鎬璽劉
三字通受中以生者言民受天地大中至正之理以
生 緱音勾

力行之力

史記儒林傳申公魯人天子使

如使

字音去

束帛加璧安

車駟馬迎申公天子問治亂之事申公時已八十餘
老對曰為治者不在多言顧力行何如耳 天子漢

武帝 惛德 惛嚴氏本作滔

抑

三復此詩

家語弟子行篇獨居思仁公言言義其於詩也則一日三復白圭之玷是宮緇之行也孔子信其能仁以爲異士註云異士殊異之士大戴禮引之以爲異姓婚姻以兄之女妻之行妻並去聲 宮緇 南宮緇名緇又名适字子容居南宮謚敬叔孟懿子從兄

魯論謂之南容 緇他刀切從才用切

屋漏

室西北隅日月之光所漏照之處言深隱也

楚語倚相

左氏國語中楚語 倚相 楚靈王曰是良史也能

讀三墳五典八索九丘墳典索丘四者皆書名楚靈

王倚相皆當魯昭公時 相息亮切

師長士

師長大夫也士衆士也

旅賁

賁音奔虎奔武勇士旅衆也常昭曰勇力之士

寧

門屏之間人君寧立之處屏上聲寧音貯凡處字上聲者不圈去聲者加圈

官師

諸有司之長亦云府史胥徒之長胥字平上二音

誦訓

周禮司徒屬有誦訓掌道方志以詔觀事註云說四方所識久遠之事以告王觀博古詔猶告也

執御

近侍也執近人君給使令者也

師工

晉師曠曰史為書瞽為詩工誦箴諫工者樂工誦者誦箴諫之辭瞽者為樂師故云師工師曠語見在襄

十四年

訓御

御者進也

侯包

包一作苞孔穎達詩正義侯包云衛武公刺王室亦
以自戒行年九十有五猶使人日誦是詩而不離於
其側王伯厚困學紀聞朱子謂不知此出何處惡
按侯包之說見於詩正義隋經籍志有韓詩翼要十

卷侯苞撰然則苞學韓詩者也益按侯苞漢時人韓詩之學今不傳矣姑存其目漢常山太傅韓嬰故訓三十六卷薛君章句二十二卷

薛韓

漢韓詩內傳四卷外傳十卷

武公年數

嚴坦叔曰今考年表武公以宣王十六年即位詩記以為其齒四十餘是也孔疏以為宣王三十六年即位恐誤年表武公終於平王十三年年表史記諸

侯年表 武公名和即共伯和

桑桑

芮良夫

芮畿內國名伯爵與周同姓為周司徒左傳文公元
年秦穆公曰周芮良夫之詩曰大風有隧貪人敗類
疑立

疑音疑魚力切儀禮鄉飲酒禮賓西階上疑立主人
阼階東疑立士昏禮婦疑立于席西並同

綴旒

公羊傳襄公十六年三月戊寅大夫盟君若贅旒然
贅亦作綴去聲丁衛切入聲丁劣切綴旒者言其危
而欲絕也大夫強而君弱之比

共和

史記周本紀厲王

名出奔於囂太子靜

宣王

匿召公

冢召公周公二相行政號曰共和共和之十四年厲
王死于囂太子靜長于召公冢二相乃共立之是為

宣王國語曰彘之亂宣王在邵公之宮國人圍之邵公曰昔吾驟諫王王不從是以及此難今殺王子王其以我為懟而怒乎夫事君者險而不懟怨而不怒況事王乎乃以其子代宣王宣王長而立之韋昭註曰彘之亂公卿相與和而修政事號曰共和凡十四年召邵通名字加圈周召二公世有之非公旦公奭之後羅泌羅革以為共伯和共平聲

榮夷公

史記厲王即位三十年好利近榮夷公大夫芮良夫
諫厲王曰王室其將卑乎夫榮公好專利而不知大
難音夫夫利百物之所生也天地之所載也而有專之
其害多矣天地百物皆將去焉何可專也所怒甚多
而不備大難以是教王王其能久乎夫王人者將導
利而布之上下者也使神人百物無不得極猶日恠
惕懼怨之來也故頌曰思文后稷克配彼天立我蒸
民莫匪爾極大雅曰陳錫載周是不布利而懼難乎

故能載周以至于今今王學專利其可乎匹夫專利
猶謂之盜王而行之其歸鮮矣榮公若用周必敗也
厲王不聽卒以榮公為卿士用事後國人相與畔襲
厲王厲王出奔于彘在位凡三十七年

圮族

書鯀圮族圮敗也族類也鯀音衮夏禹父崇伯之名
圮部鄙切音否卦之否係之上聲

千慮一得

西漢書韓信傳廣武君李左車謂信曰臣聞智者千慮必有一失愚者千慮亦有一得故曰狂夫之言聖人擇焉

陰

於鴟切如漲橫渠密告之說則陰為平聲

雲漢

仍叔

仍圻內國邑名諸侯為卿士者圻畿通仍叔芮良夫

榮夷公仍芮榮皆采地榮在河南鞏縣西

雲漢天河

曹氏曰或謂水氣在天為雲水象在天為漢或謂箕斗間為漢津雲在漢津謂之雲漢皆非也夫雲合散不常漢在天似雲非雲故曰雲漢也史遷云漢者金之散氣其本曰水張衡云水精為漢天將雨其兆先見於漢天漢起于東方經尾箕之間是為漢津逶迤向西南行至七星南而沒此其回旋之度也宋有曹

幽東畎亦解詩

索鬼神

地官司徒以荒政十有二聚萬民其十有一曰索鬼神鄭氏註云求廢祀而修之

奠瘞

孔穎達曰奠謂置之於地瘞謂埋之於地按祭法瘞埋於泰折祭地也祭地之禮瘞埋其牲幣於地泰折即方丘祭地處折之列切音哲

雩祀百辟

月令仲夏之月命百縣雩祀百辟卿士有益於民者
鄭氏註雩吁嗟求雨之祭也百辟卿士古者上公若
勾龍后稷之類

天宗

月令註日月星辰謂之天宗

師氏以兵守門

地官司徒師氏凡祭祀賓客會同喪紀軍旅王舉則

從聽治亦如之使其屬帥四夷之隸各以其兵服守王之門外且蹕朝在野外則守內列 朱子於小雅十月之交傳云師氏掌司朝得失之事於此詩傳云師氏掌以兵守王門者各因其職之所在而分言之讀者互觀焉可也

徹膳

徹猶去也謂減損也孔穎達曰徹膳者天子日食太牢今減損之 牛羊豕謂之太牢

左右不修

左右摠謂君左右之諸臣不修謂無所修作

無俚

漢書季布傳贊曰以項羽之氣而季布以勇顯名楚
身履軍塞旗者數矣可謂壯士及至困厄奴僇苟活
而不變何也彼自負其材受辱不修欲有所用其未
足也故終為漢名將賢者誠重其死夫婢妾賤人感
慨而自殺非能勇也其畫無俚之至耳 蘇林曰俚

賴也晉灼曰俚聊也許慎曰俚賴也其為計畫無所聊賴至於自殺耳以許叔重兼蘇晉二說故並存之

崧高

東岱

泰山一名岱宗東方萬物始交代之處王者受命易姓報功告成必於岱宗宗長也言為羣嶽之長王者受命必封禪封者增高禪者增厚也封一山為主禪一山為儲副封泰山則禪梁父如天子太子然泰山

在今兗州

南霍

周禮荊州之鎮曰衡山衡山南嶽也以瀟霍為副爾
雅云霍山為南嶽白氏六帖云衡山有三峰一曰紫
蓋二曰石菌三曰芙蓉羅含湘中記云衡山度應斗
衡位直離宮故曰南嶽又名霍山在今湖南衡州路
泰岱衡霍皆一山二名

西華

華山記曰山頂有池生千葉蓮花因曰華山周禮職
方氏河南豫州其山鎮曰華山在今華州

北恒

職方氏并州其山鎮曰恒山白虎通云北方為恒山
者何陰終陽始其道恒久故曰恒山

嵩高

白虎通曰嵩高山者中央之岳獨加高字者何中央
居四方之中而高故云嵩高在今河南府

四嶽

唐虞官名一人而總四岳諸侯之事故曰四岳在周則齊許申呂皆其後也

尹

子朝入尹在周地尹氏采邑在鞏西南偃師縣尹吉甫墓在汾州或云墓即其邑地

大封

周禮春官王大封則先告后土乃頒祀于邦國都邑

蔡邕曰天子大社以五色土為壇東方青南方赤
西方白北方黑中央黃漢制皇子封為王者受天子
大社之土以所封之方色封東方受青土封南方受
赤土各如其方色藉以白茅苴以黃土授之歸國以
立社稷故謂之茅土

侯東平王諸子

漢書光武十王傳東平憲王蒼建武十五年封東平
公十七年進爵為王明帝永平二年封蒼子二人為

縣侯二年以東郡之壽張須昌山陽郡之南平陽

縣名

豪

縣名

湖陵

縣名

五縣益東平國十一年蒼與諸王朝京

師月餘還國帝臨送歸宮悽然懷思乃遣使手詔國

中傳曰辭別之後獨坐不樂因就車歸伏軾而吟瞻

望永懷實勞我心誦及采菽以增歎息日者問東平

王處家何等最樂王言為善最樂其言甚大副是要

腰

腹矣今送列侯印十九枚諸王子年五歲已上能

趨拜者皆令帶之

近

近鄭氏音記許氏說文从疋从丌按字書疋音丑略切丌音巨基切疋字入聲與走字不同

烝民

樊

樊并𡗗鄰四字通樊者仲山甫之采邑宣王封之京兆杜陵有𡗗鄉樊川韋昭曰樊畿內邑王伯厚曰權德輿集云魯獻公仲子曰山甫入輔於周食采於樊

保

賈長沙治安策保保其身體傳傳之德義

徙薄姑治臨菑

史記齊世家太公卒丁公伋立傳已公得矣公慈
母哀公不辰凡五世紀侯諧哀公於周夷王周烹哀
公而立其弟靜是為胡公胡公徙都薄姑哀公之同
母弟山怨胡公乃與其黨率營丘人襲攻殺胡公而
自立是為獻公獻公元年盡逐胡公子因徙薄姑都

治臨菑 春秋時齊襄公殺紀侯說者以為復九世之讎 張守節曰薄姑氏殷諸侯封於此周滅之故城在青州博昌縣東北六十里鄭漁仲曰齊本顓帝之墟營丘今臨淄縣薄姑亦謂之蒲姑在其西北或云營丘故城在濰州昌樂而青州博興有蒲姑故城王伯厚曰齊世家胡公始徙都薄姑周夷王之時獻公因徙薄姑都治臨淄詩正義烝民云仲山甫徂齊傳謂古者諸侯逼隘則王者遷其邑而定其居蓋去

薄姑遷於臨淄以為宣王之時始遷與世家異毛公
當有據

韓奕

士服入見

春秋之法嗣子定位於初喪明年正位改元又明年
服喪已畢見現于京師而請命焉公羊傳文公九

年毛伯來求金毛伯者何天子之大夫也何以不稱
使當喪未君也踰年矣何以謂之未君即位矣而未

稱王也未稱王何以知其即位以諸侯之踰年即位
亦知天子之踰年即位也以天子三年然後稱王亦
知諸侯於其封內三年稱子也踰年稱公矣則曷為
於其封內三年稱子緣臣民之心不可一日無君緣
終始之義一年不二君不可曠年無君緣孝子之心
則三年不忍當也

不庭

左傳鄭莊公以王命討不庭說者曰下之事上皆成

禮於庭中不庭言不趨走於庭故討其罪

金厄

厄蟲也爾雅釋蟲云厄烏蠋郭璞註曰大蟲如指似蠶金厄者以金按轡之端如厄蟲然蠋音蜀

兩較

周禮與人註兩轎上出軾者在車之兩旁孔穎達曰式上二尺一寸別橫一木謂之較較音角轎音倚屠

屠一曰杜杜者杜伯之國也漢之杜陵杜伯所築長
安縣有杜伯塚萬年縣有周杜主祠

侯氏

儀禮覲禮篇天子稱來朝諸侯皆曰侯氏 禮記射
義引詩曰曾孫侯氏四正具舉大夫君子凡以庶士
小大莫處御于君所以燕以射則燕則譽 曾孫侯
氏以下八句舊說以為羶首篇之文諸侯推本始封
之君故云曾孫侯氏四正者舉正爵以獻賓獻君獻

卿獻大夫凡四

汾王

嚴坦叔引解頤新語曰汾王猶晉侯居翼謂之翼侯
晉人納諸鄂謂之鄂侯鄭叔段居京謂之京城太叔
及出奔共謂之共叔也恭又楚人謂王不終者為敖

葬邲者為邲敖葬訾者為訾敖其汾王之謂乎說者
以莒郊公黎比公為比非也按左氏傳莒夷無謚於
是有黎比公郊公茲丕者著丘公皆以號為稱與汾

王以地為稱者不類矣黎比之比音毗

燕

召公初封春秋之燕亳以其僻遠有寢丘留侯之意
地逼山戎六國時浸大置漁陽上谷右北平遼東西
五郡地秦滅之為上谷郡漢立燕國昭帝為廣陽國
廣陽郡唐武德為燕州後為燕山府金為大興府周
封康公於燕蓋為歸老之地所謂寢丘留侯意也康
公之召則在扶風羅長源云東遷後采於垣

食采垣邑鳳

翔天興縣東北六十里召原也有康公廟王厚齋說
見召南

城邢

春秋僖公元年經書齊師宋師曹師城邢左氏傳云
諸侯救邢邢人潰具邢器用而遷之邢遷于夷儀諸
侯之救患也

城楚丘

三年經書春王正月城楚丘傳云諸侯城楚丘而封

衛焉 邢困于狄齊桓公遷之邢遷如歸衛遭狄難
君死國滅齊桓公封之衛國忘亡

追

如字又都回切追貊如論語之言蠻貊

江漢

淮夷來求

來求之求如左宣十二年晉大夫趙括趙同云率師
以來唯敵是求

卣

卣中尊也古者之尊以彝為上卣為中罍為下故祭裸皆用彝酢皆用罍賜皆用卣

敦

敦音對周禮玉府天官屬掌王之金玉玩好若合諸侯則供珠槃玉敦註云敦槃類珠玉以為飾古者以槃盛血以敦盛食合諸侯者必割牛耳取其血歃之以盟珠槃以盛牛耳尸盟者執之尸主也盟者以

血塗口旁曰歃

邠敦

先秦古器記曰劉原父家所藏邠敦銘惟二年正月
初吉王在周邵宮丁亥王格于宣榭毛伯內門立中
庭佑祝邠王呼內史冊命邠王曰邠昔先王既命汝
作邑繼五邑祝今余惟疇京乃命錫汝赤芾彤旟齊
黃鑾旂用事邠拜稽首敢對揚天子休命邠用作朕
皇考龔伯尊敦邠其眉壽萬年無疆子子孫孫永寶

用享 邠皮變切音汴邠弁通姓有弁氏劉曜太史
弁廣明 益按春官有典庸器之職庸功也有功者
為之鑄器而銘其功於器上如邠敦之類是也後世
謂之款識 宣榭 宣王之廟

常武

仍

老子道德經上德不德章上禮為之而莫之應則攘
臂而仍之

班師

禹謨班師振旅班還也

常武篇名

濮斗南曰詩中無常武字反因講師續說而命名此
所創見也益謂漢儒尚專門之學異師相攻各講其
所傳之經故有講師漢以前無之此詩之命名當從
雨無正之例篇中無題字

瞻仰

歐陽公言

五代史宦者傳論自古宦者亂人之國其源深於女禍其用事也近而習其為心也專而忍以小善中人之意小信固人之心使人主已信然後懼以禍福而把持之前後左右日益親忠臣碩士日益踈而人主之勢日益孤勢孤則懼禍日益切而把持者日益牢安危出於喜怒禍患伏於帷闥嚮所可恃者乃所以為患也患已深而覺之欲與踈遠之臣而圖親近緩

之則養禍而益深急之則挾人主而為質

音志

雖有聖

智不能為謀大者亡國其次亡身而使奸豪得借以
為資至挾其種類盡殺以快天下之心而後已

懿

懿厥哲婦之懿古註作有所痛傷之聲故園平聲今
朱傳訓美也如字

寺

寺亦作侍寺祥吏切音嗣侍時吏切如字一作閑與

侍同是寺有寺侍二音皆謂寺人寺人閹官也閹與奄同衣庶切音淹閹官男子去勢精閉者謂之中官謂之宦者謂之黃門亦謂之璫

女戎

春秋外傳晉語獻公伐驪戎克之獲驪姬以歸有寵立以為夫人史蘇告大夫曰有男戎必有女戎若晉以男戎勝戎而戎亦必以女戎勝晉史蘇又曰國且深亂亂必自女戎夏桀妹喜有施氏商辛妲己有

蘇氏周幽王褒姒有褒氏皆女戎也

名旻

䟽粳

二者米之精粗䟽米之粗者謂糲米粳米之精者鄭
康成曰米之率糲十粳九鑿八侍御七率音類又音
律又所律切鑿子洛切吕忱字林曰糲米一斛舂為
八斗糲卽葛切孔穎達曰言米之率糲十粳九鑿八
侍御七者其術在九章算數粟米之法彼云粟率五

十糲米三十粃二十七鑿二十四御二十一言粟五
升為糲米三升以下則米漸細故數益少四種之米
皆以三約之得此數也言此明糲麤於粃故為䟽耳

詩傳旁通卷十二

欽定四庫全書

詩傳旁通卷十三

元 梁益 撰

周頌清廟之什

清廟

周公成洛邑

史記周本紀武王曰我南望三塗北望嶽鄙顧詹有
河粵瞻維伊毋遠天室營周居于維邑而後去成王
在豐使召公復營洛邑如武王之意周公復卜申視

卒營築居九鼎焉曰此天下之中四方入貢道里均
雒同 蔡仲默曰宅洛者武王之志周公成王
成之召公實先經理之

烝祭歲

王在新邑烝祭歲洛誥篇文歲者歲舉之祭

書大傳

大傳釋書之文

愀

愀七小切音悄愀然變色之貌

樂記

樂記禮記篇名

練朱絃

練朱以為絃絲不練則聲清練之則聲濁

䟽越

䟽通也越瑟底之孔也䟽而通之使其聲遲緩也䟽

音疎越如字

三歎

一倡三歎朱子云一人倡之三人之和之或以為三歎
息者非鄭氏明云三人從歎之詳味從字是從而和
之也

有遺音

瑟聲濁而遲是質素之音非極聲音之美然其中有
不盡之餘音存焉故曰有遺音者矣

乾豆上奏登歌

西漢書禮樂志高祖時叔孫通因秦樂人制宗廟樂

太祝迎神于廟門奏嘉至

樂名

猶古降神之樂也皇帝

入廟門奏永至

樂名

以為行步之節猶古采齊肆夏也

乾豆上奏登歌獨上歌不以管絃亂人聲欲在位者

偏聞之猶古清廟之歌也登歌再終下奏休成之樂

美神明既饗也皇帝就酒東箱坐定奏永成之樂美

禮已成也采齊逸詩篇名齊才私切或作蕢亦作

茨音同乾豆脯羞之屬休成樂叔孫通所作

維天之命

何以恤我

左傳襄公二十七年君子曰何以恤我我其收之向
戍之謂乎 向戍宋大夫戍雪律切

維清

典

文王之典毛傳曰典法也

烈文

君子小人

大學註君子謂其後賢後王小人謂後民

天作

徂

東漢書西南夷傳都夷傳

昨音

益州刺史朱輔上疏

曰臣聞詩云彼徂者岐有夷之行傳曰岐道雖僻而人不遠詩人誦詠以為符驗唐章懷太子賢註曰詩周頌也韓詩薛君傳曰徂往也夷易也行道也彼

百姓歸文王者皆曰岐有易道可往歸矣易道謂仁義之道而易行故岐道阻險而人不難易並去聲

岐

古有岐伯至古公避狄遷岐之陽今鳳翔府岐山縣西北有岐城故址以山之岐而得名即箭筈嶺也桓譚琴操云文王初為岐侯岐亦作邽一分為二曰岐筈古活切音括箭本受絃處曰筈其地有箭筈關

韓子

昌黎韓子退之岐山操彼岐有岨我往獨處蒲田方
氏崧卿曰岨與阻同楚辭漢書多用岨字今以平聲
讀之非也

昊天有成命

叔向引詩

國語周語晉羊舌肸

黑乙切
叔向名

聘于周單

音善

靖公享之

語說

音悅

昊天有成命單之老送叔向叔向告之曰異

哉吾聞之曰一姓不再興今周其興乎其有單子也
且其說昊天有成命頌之盛德也其詩曰昊天有成
命二后受之成王不敢康夙夜基命宥密於緝熙單
厥心肆其靖之是道成王之德也成王能明文昭能
定武烈者也夫道成命者而稱昊天翼其上者也二
后受之讓於德也成王不敢康敬百姓也夙夜恭也
基始也命信也宥寬也密寧也緝明也熙廣也單厚
也肆固也靖肅也其始也翼上德讓而敬百姓其中

也恭儉信寬帥歸于寧其終也廣厚其心以固穌之
單若不興子孫必蕃後世不忘

我將

文王之典

嚴坦叔曰典毛於維清傳云法也於此傳云常也鄭
氏以為常道法者道之所寓其實一也

人本乎祖

禮記郊特牲篇曰萬物本乎天人本乎祖此所以配

上帝也

圜丘

圜圓通周制冬至日祀天于地上之圓丘以禋祀昊天上帝精意以享之謂禋玉用蒼璧玉之圓者謂之璧牲及幣皆蒼色牲用犢幣繒丈八尺王太裘冕無旒乘玉輅錫音繁音纓音十有再就五色備一匝謂之就連太常十有二旒祀尊薦俎醢器並瓦爵匏片為之以藻秸及蒲為藉神之席樂圜鍾為宮黃鍾為角

太簇為徵姑洗為羽雷鼓雷鼗孤竹之管雲和之琴
瑟雲門之舞若樂六變則天神皆降可得而禮矣
圜鍾夾鍾也周禮春官大司樂此鍾字 太常旗天
神主北辰 雷鼓雷鼗六面有革可擊 孤竹竹之
特生者 雲和山名 祀天於南郊地上之圓丘丘
圓而高所以象天南郊之壇曰泰壇以之燔柴焉祭
地於北郊澤中之方丘丘方而下所以象地北郊之
壇曰泰折以之瘞埋焉

方丘附

夏至日禮地祇于澤中之方丘其丘在國之北禮以黃琮瑞玉八寸形似車釭謂之琮鄭氏云琮八方象地之形牲以黃犢幣以黃繒王及尸同服大裘樂函鍾為宮太簇湊為角姑洗蘇為徵南呂為羽靈鼓靈鼗絲竹之管空桑之琴瑟咸池之舞若樂八變則地祇皆出可得而禮矣祇與示同地祇主崑崙函鍾林鍾也鄭玄云雷鼓雷鼗八面靈鼓靈鼗六面

與前鄭衆之說異 絲竹竹枝根之末生者 空桑

山名

器陶匏牲犢

郊特牲郊之祭也迎長日之至也大報天而主日也

兆於南郊就陽位也掃

音去

地而祭於其質也器用陶

匏以象天地之性也於郊故謂之郊牲用騂尚赤也

用犢貴誠也

大饗

月令季秋之月是月也大饗帝

句

嘗

句

犧牲告備于

天子

仲夏之月命有司為民祈祀山川百源大雩

帝用盛樂乃命百縣雩祀百辟卿士有益於民者以
祈穀實仲夏之大雩祈也季秋之大饗報也

雩

吁也吁嗟其聲以求雨之祭一說雩遠也遠為民祈福也

曰天曰帝

朱子曰為壇而祭故為之天祭于屋下而以神祇祭

之故為之帝

以義起之

禮運篇禮也者義之實也協諸義而協則禮雖先王未之有可以義起也

時邁

殷國

殷猶衆也周禮秋官大行人之職曰王之所以撫邦國諸侯者歲徧存三歲徧覲

他吊切與眺同

五歲徧省七歲

屬象胥諭言語協辭命九歲屬瞽史諭書名聽聲音
十有一歲達瑞節同度量成牢禮同器數修法則十
有二歲王巡狩殷國夏官職方氏註云十二歲王若
不巡狩則六服盡朝通言語之官曰象胥如今之
通事朝音潮

春秋傳

左氏宣公十二年楚子

莊王名旅

曰夫文止戈為武武王

克商作頌曰載戢干戈載櫜弓矢我求懿德肆于時

夏允王保之又作武其卒章曰耆定爾功其三曰敷
時繹思我祖維求定其六曰綏萬邦屢豐年夫武禁
暴戢兵保大定功安民和衆豐財者也武有七德我
無一焉

外傳

左氏國語謂之春秋外傳魯叔孫穆子

名豹

荅晉行人

之言曰金奏肆夏繁遏渠天子以饗元侯也韋昭註
云金奏以金奏樂也

九夏

周禮春官鐘師掌金奏凡樂事以鐘鼓奏九夏王夏

肆夏昭夏納夏章夏齊夏族夏祴夏音駮騫音傲夏鄭

氏註曰金奏擊金以為奏樂之節金謂鐘及鐃以鐘

鼓者先擊鐘次擊鼓以奏九夏夏大也樂之大歌有

九

呂叔玉

鄭氏鍾師註國語曰金奏肆夏繁遏渠天子所以享

元侯肆夏繁遏渠所謂三夏矣呂叔玉云肆夏繁遏渠皆周頌也肆夏時邁也繁遏執競也渠思文也

臣工之什

臣工

保介

禮記月令孟春之月是月也天子乃以元日祈穀于上帝乃擇元辰天子親載耒耜措之于參保介之御間

呂氏春秋孟春紀是月也天子乃以元日祈穀于上帝乃擇元辰天子親載耒耜措之于參保介之御間高誘曰元善也辰十二辰從子至亥也耒耜耕器也措置也保介副也御致也擇善辰之日載耒耜之具於籍田致于保介之間施用之也

呂覽

史記太史公自序云不韋遷蜀世傳呂覽 呂不韋
春秋十二紀八覽六論十二紀六十一篇八覽八十

三篇六論三十六篇總百八十篇秦相呂不韋與門
客同為之謂之呂氏春秋高誘為之註八覽者有始
覽孝行覽慎大覽先識覽審分覽審應覽離俗覽恃
君覽凡八

噫嘻

萬夫之地

周禮地官遂人掌邦之野

郊外曰野此野字指甸
稍縣鄙之地稍去聲

五

家為鄰五鄰為里四里為鄼

音慕

五鄼為鄙五鄙為縣

五縣為遂凡治野夫間有遂遂上有徑十夫有溝溝

上有畛

貞畛
二音

百夫有洫洫上有涂

洫忽域切
涂亦作遂

千夫有

澮澮上有道

澮
檜

萬夫有川川上有路以達于畿鄭氏

註曰十夫二鄰之田百夫一鄼之田千夫二鄙之田

萬夫四縣之田遂溝洫澮皆所以通水於川也徑畛

涂道路皆所以通車徒於國都也徑容牛馬畛容大

車涂容乘車一軌道容二軌路容三軌凡車由軌以

上為軌

音

輶車轅也萬夫者方三十三里少半里九

而方一同而南晦圖之則遂從溝橫洫從澮橫九澮
而川周其外焉 從音蹤

鄉遂司稼

六鄉六遂 地官司稼掌巡邦野之稼而辨其種蒔
之種周知其名與其所宜地以為法

溝洫用貢法

王厚齋曰周禮遂人治野乃鄉遂公邑之制匠人溝
洫乃采地之制鄭康成云周制畿內用夏之貢法稅

夫無公田邦國用殷之助法制公田不稅夫朱文公亦云溝洫以十為數井田以九為數井田溝洫決不可合

振驚

杞

史記陳杞世家杞東樓公者夏后禹之後苗裔也殷時或封或絕周武王克殷紂求禹之後得東樓公封之於杞以奉夏后祀傳西樓公題公陸渾曰東樓公

封杞今陳留雍丘是九代成公遷緣陵文公居淳于
凡二十一代楚滅之

宋

宋子姓公爵其先契為舜司徒而封商契子昭明昭
明子相土春秋之宋古之商丘唐火正遏伯之墟相
土因之漢為睢陽隋為宋城宋南京治縣西南十二
里有微子廟五隕石

腊拜

左傳僖公二十四年皇武子對鄭文公曰宋先代之
後也於周為客天子有事膳焉有喪拜焉豐厚可也
鄭伯從之享宋公有加禮也 膳音煩祭肉也

有瞽

合乎祖

孔穎達曰周公攝政六年制禮作樂合諸樂器於太
祖之廟奏之經皆言合諸樂器奏之事也言告于
太祖則特告太祖不因祭祀且不告餘廟以樂初成

故於最尊之廟奏之耳此太祖謂文王也毛以為始作大武之樂

輦

輦音循小鼓在大鼓傍

祝

祝木控也祝音充之入聲控苦江切

圉

圉榻也榻苦賄切

桐

桐達孔切音動義亦同

潛

樛

爾雅釋器曰樛謂之洿

古潛字

李巡曰今以木投水中

養魚曰洿孫炎曰積柴養魚曰樛郭璞云今之作樛者聚積柴木於水中魚得寒入其裏藏隱因以簿圍

取之

樛或從米旁爾雅從木旁音霜甚切

森之上音

亦

作霖音疏簪切

雖

周人以諱事神

左氏莊公六年魯申繻曰周人以諱事神名終將諱之君父之名臣子雖不敢斥言然禮卒哭之後舍故諱新謂舍親盡之祖而諱新死者故云以諱事神名者生者之名終則諱之者人死曰終名終曰諱自高祖至父皆不敢斥言故云名終將諱之周人諱殷

人不諱

享右祭祀

周禮春官太祝辨九摻以享右祭祀 右讀為侑侑
勸尸食而拜也摻與拜同九拜者一曰稽首拜頭至
地二曰頓首拜頭叩地三曰空首拜頭至手今謂之
拜手四曰振動動音董謂以兩手相擊五曰吉拜謂
拜而后稽顙六曰凶拜謂稽顙而后拜七曰奇拜謂
先屈一膝奇音基八曰褒拜褒音報即今之再拜九

曰肅拜但俯下手如今之揖也

載見

穆考

書稱穆考文王見酒誥篇宗廟之位太祖居中左昭
右穆王季為昭文王為穆故稱穆考

有客

微子

微國名子爵本扶風之郃陽今岐之郿縣有郿鄉紂

徙之畿內則在郕城今故城在潞東北樂史寰宇記
微城在潞東北三十里

姜且

曹氏曰姜如姜兮斐兮且如籩豆有且言其姜且有
文如曹氏說則且音子余切且多貌

武

周公作大武

呂氏春秋仲夏紀古樂篇武王即位以六師伐殷六

師未至以銳兵克之於牧野歸乃薦俘馘于京太室
乃命周公為作大武

千戚舞大武

禮記明堂位升歌清廟下管象朱干玉戚冕而舞大
武註云朱干赤盾也玉戚玉飾斧柄也著袞冕而執
此千戚以舞武王伐紂之樂

閔予小子之什

閔予小子

予小子

曹氏曰曲禮天子未除喪曰予小子然洛誥云予小子其退即辟于周蓋成王常以幼冲自處故每稱之耳

熒熒在疚

匡鼎來

前漢匡衡傳元帝崩成帝即位衡上疏曰陛下秉至孝哀傷思慕不絕於心未有游虞娛弋射之宴誠隆於慎終追遠無窮已也竊願陛下雖聖性得之猶復

加聖心焉詩云覺覺在疚言成王喪畢思慕意氣未
能平也蓋所以就文武之業崇大化之本也

附首卷鼎來之義 無說詩匡鼎來鼎當也方也

羹牆

後漢李固傳昔堯殂之後舜仰慕三年坐則見堯於
牆食則見堯於羹斯所謂聿追來孝不失臣節者
梁冀之黨作飛章以誣搆李固之罪故為此言

登降堂只

楚辭大招三公穆穆登降堂只諸侯畢極位九卿只
朱子楚辭後語曰周頌陟降庭止傳注訓庭為直而
說之云文王之進退其臣皆由直道諸儒祖之無敢
違者而顏監於匡衡傳所引獨釋之曰言若有神明
臨其朝廷也蓋匡衡時未行毛說顏監又精於史學
而不桎於專經之陋故其言獨能如此無所阿隨而
得經之本指也余舊讀詩而愛顏說然尚疑其無据
及讀此大招詞乃有登降堂只之文於是益信陟降

庭止之為古語其義審如顏說而無疑也

小毖

鷦鷯生鵬

桃蟲鷽也今鷽鷽也一名鷽鷽

亡消切音苗

許慎曰鷽鷽

桃蟲也陸璣曰微小於黃雀其雛化而為雕故俗語

云鷽鷽生雕郭璞曰鷽鷽桃雀也俗呼為巧婦鷽鷽

小鳥而生鵬鷽者也愚益謂鷽鷽生鵬之說物之變

化容有此理世有鳥名鷽禮者俗謂之鷽舅

鷽音佳朱惟切

郭璞註爾雅所謂烏鵲者是也爾雅釋鳥謂之鷦鷯
鷦音及此烏鵲巢中或時產鷽蓋其生乳衆雛亦或為
鷽然亦理之不可詰者也

載芟

柞氏

周禮秋官柞氏掌攻草木及林麓夏日至今刊陽木
而火之冬日至令剥陰木而水之若欲其化也化猶生也
則春秋變其水火凡攻木者掌其政令註云柞除木

之名除木者必先校剝之柞側百切校古飽切

彊予任毗

地官遂人註彊予謂民有餘力復予之田若餘夫然予與同一夫受田百畝有弟為餘夫

閒民

天官太宰之職以九職任萬民九曰閒民無常職轉移執事司農鄭衆曰閒民謂無事業者轉移為人執事若今時雇力然閒音閑

函

函戶南切良耜篇同函含音同其音咸者音義與戶南切者不同

飣

飣蒲節切又蒲必切嚴坦叔音離別之別

且

且七也切

良耜

茶蓼

蓼一名薑一名虞蓼見於爾雅釋草毛傳於此云蓼水草也孫炎云虞蓼澤之所生故為水草

刺

毛傳趙刺也鄭箋以田器刺地疇去茶蓼之事刺七迹切

絲衣

視壺濯

周禮太宰小宗伯皆言眡滌濯鄭康成曰滌濯謂溉
祭器及甑甗之屬眡與視同甗音彥又上聲孔穎
達曰正祭則小宗伯省牲眡滌濯逆盥省鑊告時于
王告備于王此繹祭輕故使士蓋亦宗伯之屬盥音
咨黍稷在器也

基

爾雅釋宮門側之堂謂之塾陳少南曰廟門之外有
塾焉所以繹尸也

告充

鄭氏箋又視牲

句

從羊之牛反

句

告充

句

酌

武宿夜

禮記祭統夫祭有三重焉獻之屬莫重於裸聲莫重
於升歌舞莫重於武宿夜孔穎達疏曰武王至商郊
停止宿夜士卒皆歡樂歌舞以待旦故名焉

勺

酌卽勺也張橫渠曰勺是周公制禮樂時有所增添
毛傳朱傳分句 古註本實維爾公勺允師勺一章
九句今通為一句故一章八句

桓

軍後凶年

老子道德經儉武篇以道佐人主者不以兵強天下
其事好還師之所處荊棘生焉大軍之後必有凶年
好去聲

克殷年豐

左傳僖公十九年秋衛人伐邢以報菟園之役於是
衛大旱卜有事於山川不吉甯莊子曰昔周饑克殷
而年豐今邢方無道諸侯無伯天其或者欲使衛討
邢乎從之師興而雨 伯音霸謂諸侯霸主如字亦
通謂方伯也

間

間代也 間代之間去聲音澗與魚麗之間同

賚

於

於繹思之於毛傳如字今音烏

般

般

般薄寒切蘇氏曰遊般也曹氏曰般旋也取般旋之

義

墮

隋古註吐果切从山不從土

河

爾雅九河曰徒駭曰太史曰馬頰曰覆鬴曰胡蘇曰
簡曰潔曰鉤盤曰鬲津凡九蔡仲默云其一河之經
流先儒不知遂分簡潔為二古今言河者夾滌鄭漁
仲最詳今攷其通志地里略 河水自西域來其大
源有三正源出崑崙山東北陬而東行一源出天竺
葱嶺一源出于闐南山北行與葱嶺河合而東入於

崑崙河或云張騫窮河源至葱嶺河爾故西域傳云
河有兩源一出葱嶺一出于闐而沒其正源也三河
合而東過蒲昌或云入蒲昌海而復東出於理不然
乃東至積石山下有石門河水冒以西南流是為中
國河積石山屬鄯州禹之所道自此始故其詳得聞
焉遂過西平即鄯州又東南過枹罕河州也有洮
水從西來入焉又東過臨洮洮州也有離水從西來
入焉又東過金城允吾縣

允音汾
吾音衙

湟水從西來入焉

金城蘭州也遂轉而北過武威涼州也又北至朔方
故夏州也遂轉而東南又南過上郡白土縣圜水從
西來入焉上郡綏州也又南過隰州大寧縣壺口山
又南過北屈今慈州古鄉也而為採桑津又南過龍
門有汾水從東來入焉龍門縣今隸河中又南過夏
陽梁山之東又南過汾陰縣西邵陽縣東又南蒲阪
縣雷首山西蒲阪今河東也有凍音速水從東北來入
焉又南過華陰縣潼關渭水從西來入焉遂轉而東

過河北縣今陝州平陸也又東過陝縣底柱山山在
河中心水分流包山而過湍急多覆溺舟船又東崤
水從右入焉是謂崤津亦謂之茅津又東左過絳州
垣曲縣湛水從北來入焉又東而為孟津又東過河
陽縣南洛陽縣北又東過溫縣沮水從西北來入焉
又東右過鞏縣洛水從西南來入焉左過成皋縣北
沅音水從北來入焉成皋今孟州汜音水縣東過大
伾山下又東汜水從南來入焉又東過滎陽縣西北

而為棘津又東過滎縣鴻溝出焉鴻溝一名官渡水

一名狼蕩渠今謂之汴河大禹塞滎澤開之以引河

水東南通淮泗狼蕩渠據桑欽所說即此也而班固

又云狼蕩渠受濟

上聲

水至陳入潁未詳其實又東北

過懷州武涉沁水入焉又東過酸棗縣西濮水東出

焉或云漢文帝時河決酸棗東潰金隄發卒塞之其

水遂絕又東北而為延津又東北左過黎陽大伾山

黎陽今通利軍治也

宋通利軍今河北境

有淇水從西來入焉

淇水即降水也又東北過濮陽縣別出為瓠子河漢武帝時河決瓠子水注鉅野通于淮泗發卒塞之又

東北過東武陽今大名朝城也而為漯

託合切

河又東

北過大名館陶縣別出為屯氏河又東北過清河靈

縣別出而為鳴犢河靈縣隋省入博平今隸博州鳴

犢河至瀛州蓆

定笛切

縣與屯氏河通三河今皆絕矣

又北過德州平原又東北過棣州厭次又東北過濱州渤海又東北過青州千乘又東北過甲下邑別出

一枝入濟又東北入於海舊說禹導河至頓丘分為
二渠一曰漯川出武陽至千乘入渤海一曰北瀆出
貝丘至大陸北播為九河同為逆河入于海舊云大
陸在鉅鹿北乃故大陸縣唐改為昭慶開寶中改為
隆平近省為鎮入趙州臨城然禹貢大陸當只是汲
郡吳澤非趙州大陸縣也漢成帝時河隄都尉許商
上言古記九河之名有徒駭胡蘇鬲津今見在成平
東光鬲縣界中自鬲津以北至徒駭其間相去二百

里是九河所在徒駭最北鬲津最南徒駭在成平胡
蘇在東光鬲津在鬲縣又知其六河以次推之曰太
史曰馬頰曰覆釜在東光之北成平之南曰簡曰潔
曰鈎盤在東光之南鬲縣之北今按圖志瀛州有成
平故城又有徒駭河永靜軍有光縣

大元東光縣屬景州

東連

滄州有胡蘇亭蓋因河命名而滄州復有鬲津鈎盤
太史河之名鬲縣故城在德州與滄比境鄭氏云九
河齊桓公塞之而北瀆至王莽時亦絕故世謂王莽

河在今永靜軍然臣樵每疑禹之所導無二河按禹
貢又東過洛汭至於大伾北過降水至於大陸又北
播為九河同為逆河入于海又按武帝元光三年春
河水徙從頓丘東南流入渤海是為朝城之漯河也
然則今河之入海者入渤海爾禹貢所謂入於海者
由碣石之海碣石今在平州北瀆者乃禹所導之河
其後河犇漯川入於渤海故瀆遂絕九河不復通蓋
故瀆在北漯川在東河決而東勢則然也恐非齊桓

公所塞自河決漯川之後北瀆遂微九河皆絕但王
莽河上承北瀆下入逆河為一河微通奈北勢高故
後亦絕但由漯川爾大抵河自西戎入塞經秦隴陝
洛夾山而行故少有決徙之患自河陽以下東至海
千里平田虛壤故多奔決而無定流也 漢書溝洫
志四瀆河為宗 愚按今黃河入海在淮安安東境
內安東宋漣水軍

海

海晦也納百川之水包九州之廣暗晦難知也東海
曰滄海曰渤海曰渤澥南海曰漲海西海曰青海北
海曰瀚海大抵西海絕遠不可至東南之海水多傾
泄就下所謂地不滿東南者謂皆水也大瀛海環九
州者是九州之外復有九州則近誕而不經矣又今
北方有小水輒謂之海子按史記註塞內得水為河
塞外得水為海其小水海子之稱自古已然因併記
之

詩傳旁通卷十三

欽定四庫全書

詩傳旁通卷十四

元 梁益 撰

魯頌

賜天子禮樂

衛正叔

混

禮記集說曰伊川程氏曰成王之賜伯禽

之受俱非也以愚觀之成王未必賜伯禽未必受蓋

魯人僭用天子禮樂爾 陳用之

祥

禮書曰天子之

樂而魯有之康周公故也世衰禮廢魯不特用於周

公之廟而羣廟亦用焉故子家駒譏之不特用於魯之羣廟而諸侯之廟亦用焉故郊特牲譏之以至八佾作於季氏之庭舞振於文夫人之側則先王之樂掃地而可知矣位嚴坦叔祭詩緝曰曹氏曰明堂位云成王命魯公世世祀周公以天子之禮樂祀帝于郊配以后稷天子之禮也若魯公果受成王之命則當自伯禽以後踵而行之矣由伯禽至僖公凡十有八世考諸春秋史記皆未嘗行郊禮而惟僖公

行之豈成王之命獨豫加於僖公歟故知其僭自僖
公始也夫以諸侯而僭天子之禮天子雖不能討
而天亦吐之矣是以僖三十一年四卜郊不從乃
免牲宣三年春郊牛之口傷改卜牛牛死乃不郊
成七年春麋鼠食郊牛角牛死皆改卜牛然則天
之不畀其祀亦可見矣夫祭天天子之大事
大禮也猶敢僭而行之焉則其僭而作頌抑其次
也

請命作頌

黃東發

震

日抄曰愚按行父文公六年如陳如晉至

襄公五年卒其見於經者凡五十四年使行父壽踰七十計其在文公時年方弱冠僖公者文公之父也行父安得迨事僖公而為之請命于周若史克又後行父十年方見於經恐亦未必迨事僖公也且序之為此說者以魯有頌為僭而行父魯名臣也謂其嘗請命于周則魯非僭耳然魯之僭莫大于郊矣明堂

位言成王賜伯禽以天子禮樂使世世以祀周公審
如此說亦未必使之郊天行天子之事也況呂覽明
言魯惠公請郊禮于平王而史角往魯呂覽作於秦
明堂位作於漢是成王賜天子禮樂之事未必有之
故自伯禽至莊公十七世未聞有郊天者僖公三十
一年始卜郊而卜不從繼此若宣若成若定欲郊則
牛輒傷禮之不可僭神之不歆其祀如此魯人曾不
知愧反以郊為盛事而張皇之序者尚欲避頌之為

僭何異放飯流歆而問無齒決耶且魯頌非商周郊廟之頌也臣子祈願其君而後世序詩者加頌之名以代列國之風所謂美耳郊僭也乃以為僭詩非用之郊者反以為僭而請之乎且此詩作于誰而請之也謂作于僖公僖公不應自頌其美謂作于臣子臣子不應專達於朝然則序詩者特未可知也劉元城嘗言我藝祖不事虛文至太宗朝方用兵河東羣臣已作歌詩淮夷固魯積患也僖公僅嘗從齊桓公會諸

侯於淮反因此見止於齊明年乃得歸可羞之甚者
也魯人反作詩歌以誇其大功雖曰祈願之辭然此
亦魯之所以不競也歟右請命作頌雖序說亦所當
知

季子

左傳襄公二十九年吳公子札來聘請觀于周樂使
工為之徧歌之札吳王壽夢之第四子故云季子

延州來季子 州來古國也吳取之以封季子地志

云吳封季札州來而居延陵故曰延州來按延陵有五
一在代郡一在綏州一在丹徒皆非季子之居一
在金陵然亦非古之延陵在今常州晉陵縣北七十
里江陰之西三十五里地曰申蒲札退耕在是有札
之墓孔聖書其碣云嗚呼有吳延陵君子之墓凡十
字羅長源路史曰江陰芙蓉湖西馬鞍山札耕處

駟

駟

青驪驎良忍切

魚

或引爾雅作𩺰

思無邪斷章

左襄二十八年盧蒲癸曰賦詩斷章
斷音短言賦
詩者但取其一章為義斷取其一章也

泮水

受成訊馘

禮記王制曰受命於祖受成於學出征執有罪反釋
奠于學以訊馘告鄭康成註受命于祖告祖也受命
于學定兵謀也釋菜奠幣禮先師也孔穎達疏訊言
也是生而可言問者也馘截耳也是死而截其左耳
也

五十矢為束

孔穎達曰古者一弓百矢毛以五十矢為束荀卿論
兵云負矢五十箇荀毛之師故從其言耳穎達又曰

束矢當百箇而在軍之禮重弓以備折壞或以分百矢為兩束

荀毛之師

初孔子以詩授卜商商以授曾申申授李克克授孟仲子仲子授根牟子牟子授荀卿卿授毛亨亨授毛萇亨大毛公萇小毛公萇授貫長卿長卿授解延年延年授徐教荀卿名况趙人

閼宮

先種曰穉

毛傳本云先種曰植後種曰穉按穉植非谷名乃生熟早晚之稱

白牡騂剛

禮記明堂位云殷白牡周騂剛公羊文十三年傳云魯祭周公何以為牲周公用白牡魯公用騂剛何休註公羊云白牡殷牲也周公死有王禮謙不敢與文武同也不以夏黑牲者謙改周之文當以夏避嫌也

駢櫜赤脊周牲也魯公伯禽以諸侯不嫌故從周制以脊為差

楅衡

楅音逼以木束角也楅設於角衡施於鼻皆所以止觸

常

魯邦是常之常鄭氏箋云守也載嘗之載傳以為則箋以為始

三壽

王伯厚困學紀聞曰晉姜鼎銘保其孫子三壽是利
魯頌三壽作朋蓋古語也

壽母

成風莊公之妾僖公之母成謚也風姓也須句國之
女風姓句音僖立時年長故稱成風為壽母

魯朝宿之邑

左桓元年鄭伯以璧假許田杜元凱云成王營王城

有遷都志故賜周公許田以為魯國朝宿之邑其地
近鄭故鄭易之按朝宿之邑者朝覲往來所宿之邑
也此詩居常與許許即許田其地近鄭常一作嘗在
薛之旁莊三十一年築臺于薛薛魯地後屬齊為孟
嘗君食邑毛傳常許魯南鄙西鄙孔疏常為南鄙許
為西鄙

徂徠新甫

王伯厚曰後漢書注兗州博城縣有徂徠山亦名尤

來後魏志魯郡汶陽縣有新甫山

商頌

正考父校商之名頌以那為首

朱子曰太史公云宋襄脩仁行義欲為盟主其大夫
正考父美之故追道契湯高宗之所以興作商頌蓋
本韓詩之說諸儒多惑之者今考此頌皆天子之事
非宋所有且其辭古奧亦不類周世之文而國語閔
馬父之言亦與今序合韓詩太史公之說非也

張子曰魯頌之辭夸商頌之辭粹

殷商

鄭漁仲曰契之封商本上洛後世遷于亳故京兆杜縣亳亭是也司馬遷云禹興西羌湯起亳俱在西也及湯有天下始居于商丘復命以亳梁之谷熟是也本帝嚳之都故曰湯始居亳從先王居自契至成湯凡八遷亳都有澗水在焉故亦謂之殷後世遷于囂遷于相遷于耿遷于朝歌而殷商之名未始偏廢以

開國命受之祖所以命也

商 商丘

契封商子昭明居砥石復遷商昭明子相土居商丘
帝嚳四后次妃有娥女曰簡狄簡亦作東狄亦作翟
感乙致胎齔而生契乙者燕也齔者胸剖而生也齔
音平之入聲契字亦作鷩亦作禹亦作僕四字同音
堯命契為司徒使布五教至虞不廢是以受商賜姓
子氏商人謂之玄王契所封之商在商州上洛縣華

陰鄭縣有轅都城及故潘邑世本云契居蕃闕駟云
蕃在鄭西今之轅城地有商山轅亦作轅並盧官切
潘與蕃同音翻商丘乃唐火正之官閼伯所封之故
墟相土因而居之其地在漢為睢陽在唐為宋州
在宋為南京應天府在亡金為歸德府自契以下十
有二世而湯遂興商之商洛古義均國舜子義均
封於商故曰商均在漢為商縣盛弘之荊州記云武
關西北百二十里商城是也

亳

亳之名則一其為地則五而譙郡之亳弗與焉成湯都南亳在穀熟縣古高辛所都之地與葛為鄰穀熟在宋為南京屬縣葛則寧陵之葛鄉也一在長安杜縣南商先世居之有亳亭亭有澱水一在河南偃師謂之西亳或以此為湯都然去葛七八百里非可使亳衆往為耕者一在考城謂之北亳亦曰景亳有景山亳城湯亭古亳城在考城東北五十三里有湯塋處

亦有澍水考城於今為歸德睢州之屬縣一在鄭地
左襄十一年盟於亳城北鄭地也亳縣本濟陰故亳
今亳州譙郡近於穀熟之南亳又有南北亳亦皆曰
商乃後代之襲名或以考城為南亳安陽為北亳安
陽即相州外城孔穎達亦不能辨又有南西北亳為
三亳阪尹者羅長源曰按三阪東城皋南轅轅西降
谷分亳民于三所爾

亳王 周穆王桓王之時別有一湯亦號亳王為秦

所滅乃西戎之君葬於亳地者非成湯也

戴公

成王殺武庚封微子啟於宋代武庚為殷後至戴公
凡十君戴公當周宣王之時

那

商人尚聲

禮記郊特牲殷人尚聲臭味未成滌蕩其聲樂三闋
然後出迎牲聲音之號所以詔告于天地之間也註

云臭味未成牲未殺也滌蕩宣播也迎牲迎於廟門之外也

齋之日祭之日

禮記祭義註見所為齋者思之熟也所嗜素所欲飲食者也周還出戶謂薦設時也無尸者闔戶若食間則又出戶而聽之疏曰先思其粗漸思其精故居處在前樂嗜在後 優音愛微見貌還音旋平聲愾開代切

容聲

東匯澤陳雲住

澗

曰舉動容止之聲也

嘉容

容謂先代之後如益稷書之虞賓在位謂堯子丹朱
為賓於虞 丹朱 堯子朱封於丹淵

閔馬父

閔馬父魯人襄公傳書閔子馬昭公傳書閔馬父一
人而異其書若子馬父者然

正考父

宋繆公生弗父何弗父何生宋父宋父生正考父正考父為孔子七世祖

名頌

韋昭註國語云名頌頌之美者

其輯之亂

韋昭曰輯成也凡作篇章義既成撮其大要以為亂辭詩者歌也所以節舞者也如今三節舞矣曲終乃

更變章亂節故謂之亂也

烈祖

羹定

定丁磬切音訂又如字禮器云納牲詔於庭血毛詔於室羹定詔於堂三詔皆不同位蓋道求而未之得也註云羹肉汁也定肉熟也煮之既熟將迎尸入室乃先以俎盛羹及定而告神於堂此是薦熟未食之前也鄭康成曰羹定謂割牲時也羹以其味之和而

羹成定以其體之熟而無變儀禮云肉謂之羹定猶熟也

玄鳥

有娥

淮南子有娥在不周之北張守節史記正義按記云
桀敗有娥之墟有娥當在蒲州羅長源云蓋在陝虢
之間娥訛為嵩故有娥氏嵩氏

九有

鄭氏箋九有履有九州為主也

武王

史記殷本紀湯曰吾甚武號曰武王湯名履亦曰天
乙或曰字也或曰夏殷之王皆以名為號按諡法除
虐去殘曰湯然諡法至周乃有之

維河

朱子初解河商所都如盤庚民不肯涉河以遷即此
河也景負維河則以諸侯輻湊而至于河也負音圓

鄭氏音云下篇長發輻隕既長之隕亦音圓朱傳音
員徐邈音于貧切

景亳之命

左昭四年楚子合諸侯于申椒舉言於楚靈王曰夏
啟有鈞臺之享商湯有景亳之命周武有孟津之會
鈞臺在河南陽翟縣啟享諸侯于此河南鞏縣西南
有湯亭或言亳即偃師湯會諸侯于此

長發

玄王

國語周語玄王勤商十四世而興魯語自玄王以及
主癸莫若湯韋昭曰玄王契也歐陽文忠公曰書稱
格王寧王蓋古人往往以美稱加王爾玄者深微之
謂也

中葉

契興於唐虞大禹之際功業著於百姓百姓以平封
于商賜姓子氏禮緯云祖以玄鳥生子也契子昭明

昭明子相土相土子昌若昌若子曹園曹園子冥冥
子振振子微微子報丁報丁子報乙報乙子報丙報
丙子主壬主壬子主癸主癸子天乙是為成湯司馬
貞史記索隱云相土佐夏功著於商詩頌相土烈烈
是也

日躋

孔子家語弟子行篇成湯恭而以恕是以日躋

旒縿

詩詁曰旂所垂為旒衆旒所著為繆繆者旌旗之正幅也著者綴也繆音衫著直略切

係屬

公羊傳君若綴旒然註云綴繫屬也繫屬之與係屬音義並同 屬音燭 漢書五行志君若綴旒不得舉手應劭曰旂旌旗之旒隨風動搖顏師古籀曰言為下所執隨人東西旂音由

駿尾

荀子榮辱篇作駿蒙蒙之讀如厖齊詩作駿駮駮駮
謂馬也按隋書以為齊詩魏代已亡今舉其說益雜
見於傳註者耳

韋

大彭承韋者顓頊孫陸終之子曰錢錢之字曰鏗封
于彭是為大彭彭祖以雉斟養性事放勳夏之中興
別封其孫元哲于韋是為承韋迭為夏伯元哲一作
元喆哲喆音同羅長源曰國都記承韋氏彭氏之國

劉累更封之故世本謂承韋防姓杜預云東郡白馬縣東南有韋城隋為韋城縣今滑州白馬縣南韋鄉也有泰龍井

顧

顧己姓子爵高陽之氏後有顧有溫夏諸侯之國濮州范縣東南二十八里有古顧城古今人表以為鼓
顏師古曰鼓即顧也顧為商所滅溫為狄所滅

昆吾

昆吾己姓國帝顓頊妻勝奔氏曰嫫生伯偃卷章季
禺卷章娶樞水氏曰嬌生犂及回犂為祝融回食邑
于吳曰吳回吳回生陸終陸終娶鬼方氏曰嬪孕三
年生子六人曰樊曰惠連曰錢曰求言曰晏安曰季
連以六月六日坼左而生三人剖右而生三人所謂
孿生坼鬴者孿力充切音孿雙生也樊為己姓封昆
吾昆吾為夏伯主其後裔與桀同滅此見羅氏路史
東漢郡國志云東郡濮陽古昆吾國

阿衡

唐河內馬貞史記索隱曰孫子兵書云伊尹名摯
孔安國云伊摯然解者以阿衡為官名阿倚也衡平
也言依倚而取平也書曰惟嗣王弗惠于阿衡亦曰
保衡皆伊尹之官號非名也皇甫謐曰伊尹力牧
之後生于空桑呂氏春秋曰有仇氏採得嬰兒于空
桑後居伊水命曰伊尹尹正也湯使之正天下

帝昀

朱子于長發題下傳云大禘不及羣廟之主此疑為
禘祭之詩經無明文不可攷也李格非禮記解曰夏
道忠故大祭有禘而無禘殷人質故大祭有禘而無
禘周則五年而兼用之謂殷無禘祭則長發之禘何
為而然 禘禘無定說 唐陸氏淳春秋纂例曰趙
子曰禘者帝王立始祖之廟猶謂未盡其追遠尊先
之義故又推尋始祖所出之帝而追遠之以其祖配
之者謂於始祖廟祭之而便以始祖配祭也此祭不

兼羣廟之主為其踈遠不敢褻狎故也其年數或每
年或數年未可知也或問曰禘非時祭之名則禮記
諸篇所說其故何也趙子曰禮記諸篇或孔門之後
末流弟子所撰或是漢初諸儒私撰之以求購金皆
約春秋為之見春秋禘于莊公遂以為時祭之名見
春秋惟兩度書禘一春一夏所以或謂之春祭或謂
之夏祭各自著書不相符會理可見也鄭玄不相尋
討本原但隨文求義解此禘禮輒有四種其註祭法

及小記則云禘是祭天註毛詩頌則云禘是宗廟之祭小於祫註郊特牲則云禘當為初註祭統王制則云禘是夏殷之時祭名殊可怪也 趙子趙匡字伯循唐天水郡人 橫渠張子子厚曰欲知禘之說當如趙伯循斷然立義 信齋楊氏復曰祫祭有二曾子問曰祫祭於祖則祝迎四廟之主王制云天子祫嘗祫烝諸侯嘗祫烝祫此時祭之祫也公羊傳曰毀廟之主陳于太祖未毀廟之主皆升合食于太祖此

大祫毀廟未毀廟之主而祭之也祫猶合也祫祭惟此二條此外無餘禮漢儒之論又混禘祫而并言之何其紛紛多端耶 三山林氏少穎之奇曰禘祫之

說諸儒聚訟久矣論年之先後則鄭康成高堂隆謂先三而後二徐邈謂先二而後三辨祭之大小則鄭康成謂祫大於禘王肅謂禘大于祫賈逵劉歆謂一祭而二名禮無差降又或謂禘以夏不以春祫以冬不以秋矛盾相攻卒無定論此皆置而勿辨其可深

責者始為私見陋說名諸儒之紛紛者其鄭氏之失歟鄭氏之說曰魯禮三年喪畢而祫于太祖明年禘于羣廟自爾以後五年而再殷祭一禘一祫周禮廢絕久矣鄭氏何據而云為之說者周禮盡在魯鄭氏所據春秋魯禮則周禮可知矣鄭氏不知春秋固妄為此說後學又不察因為所惑也求之聖經禘祫之文不詳所可知者禘尊而祫卑矣何者禘者以始祖之廟未足以盡追遠尊先之義故推尊祖所自出之

君而追祀之則謂之禘此天子祭名諸侯無禘禮若
祫則毀廟未毀廟之主皆合食于太祖非惟天子有
祫諸侯亦得祫也詳二祭之名則禘尊祫卑可謂明
矣考之經籍禘祫之文可知者此爾至於年數之久
近祭時之先後則經無所據學者當闕其疑不可據
漢儒臆說也

殷武

荆楚

楚芊姓子爵

芊音
屏

顓頊之子卷章卷章之子吳回吳

回之子陸終陸終之第六子曰李連李連姓芊氏曰
季芊居荊州生子曰附叙伯禹定荊州即季芊所居
之地而封之於熊故其子為穴熊夏有楚狐父其後
鬻熊子者師臣周西伯成王時復封其子熊繹于荆
居丹陽是為楚荊楚本一木名曰荊楚者言荊州之
楚也荊州蓋以荊楚之木為其州之名云 許叔重
曰堯以楚伯受命今之唐州故湖陽縣有西唐山

益按周成王封熊繹于楚居丹陽今之秭歸縣也本
曰西楚楚武王偕稱王徙枝江亦曰丹陽枝江縣隸
荆南是為南楚秦之鄣郡漢元封二年為丹陽郡西
丹陽縣乃潤州之境蕪湖縣東二十里有石城山或
以為楚始封之地楚文王徙郢在江之南是為南郢
昭王徙都今宜城也是為北郢惠王遷鄢頃襄王遷
陳號曰西楚蓋惠王滅陳頃襄王自郢徙都之今潁
水西三里有章華臺考烈王徙壽春亦曰郢懷王都

于彭城其後以海州為東楚廣陵為南楚陳及彭城
為西楚因併紀之且附荆舒之說郢若鄢偃項傾
荆舒 魯頌閼宮荆舒是懲傳謂荆者楚之別號舒
其與國也按舒之字或作郢亦作郢羣舒皆子爵地
近荆楚謂之荆舒春秋僖公三年徐人取舒其後多
為楚所滅羣舒者舒庸舒鳩舒蓼舒龍舒鮑蓼字或
作鄧鄧舒龍亦云龍舒又有舒龔在兗州之龔丘與
荆之羣舒異

鬼方

集傳云盤庚沒而殷道衰楚人叛之高宗伐其國平其地易曰高宗伐鬼方三年克之蓋謂此歟愚益按朱子此傳以鬼方為荆楚南方之地也史記黃帝紀北逐葷粥葷音熏粥音育司馬貞云葷粥匈奴別名唐虞已上曰山戎亦曰薰粥夏曰淳維殷曰鬼方周曰玁狁漢曰匈奴司馬貞史記索隱此說以鬼方為北方之地也朱子雖不取索隱之言然鬼方實指北

而非南耳

世見曰王

周禮九州之外謂之藩國世一見各以其所貴寶為
贄一世一見於王謂其父死子繼及嗣王即位乃
來朝謂之世見朝音潮見音現

高宗享國

書無逸篇肆高宗之享國五十有九年

百世不遷

宗廟之制太祖之廟百世不遷自餘則六世之後每
一易世而一遷王者祖有功宗有德高宗武丁中興
故特為百世不遷之廟公羊春秋文公二年傳何休
註太祖東鄉音向昭南鄉穆北鄉父曰昭子曰穆昭取
南面鄉明

詩傳旁通卷十四

欽定四庫全書

詩傳旁通卷十五

元 梁益 撰

叙

恭惟先正大儒文公朱子後宋淳熙四年丁酉冬十月詩集傳成自以為無復遺恨且曰後世若有揚子雲必好之矣南塘趙公汝談於晦庵諸書尤服詩傳號稱簡明斯言信允末學梁益伏讀朱傳昧焉多所未解如見堯於羹見堯於牆猶曰聖人之耦之類罔

知攸出問之老師宿儒間有補助得之耳聞目見輒
自筆錄久之浸繁用纂成帙倣蘇山杜文玉瑛語孟
旁通之例目之曰詩傳旁通僭踰之罪諒無所逃妄
誕之譏亦未能免高明過人者薄此何以為初學如
益者或可資檢閱自視其中未能通者尚多倘未溘
先朝露行當續而補之君子或憫其膚淺有肯相成
誠所願幸惟是竊伏紬繹朱子傳詩之旨大節目大
議論多於序說見之愚益未能發明其詳今姑纂輯

其略

辨詩序之作引後漢書儒林傳以為衛宏作毛詩序
今傳于世則序乃宏作明矣按漢書初謝曼卿善毛
詩乃為其訓宏從曼卿受學因作毛詩序善得風雅
之旨朱子序乃宏作之言蓋實其說也

小序先自合為一編後乃各引以起冠篇端今復并
為一編綴於經後以還其舊因以論其得失此朱子
去序言詩之本意也去序言詩雪山王氏質夾漈鄭

氏樵已有其法朱子蓋取之

謹按詩之一經有傳有箋有疏疏一名正義出于毛
萇氏者謂之傳出于鄭玄氏者謂之箋傳之為言訓
也訓釋其書也凡書非正經者謂之傳箋之為言薦
也主于薦成毛傳之意也毛萇趙人為河間太守為
北海相所訓傳者曰毛詩流傳北海鄭玄字康成北
海人取毛氏詁訓所不盡及異同者箋之當時學者
尊信康成故毛傳得鄭箋而盛行自康成之後魏王

肅字子雍有毛詩註有毛詩義駁司空王基毛詩駁
太子文學劉楨字公幹毛詩義問吳陸璣字元恪草
木鳥獸魚蟲疏晉孫毓毛詩異同評梁武帝毛詩大
義梁桂州刺史崔靈恩毛詩集註舒援沈重劉瓛張
氏隋祕書學士魯世達等之毛詩義疏至唐孔穎達
氏取毛傳鄭箋而疏之謂之正義詩之制度名物於
是大備然其訓說皆不敢背乎小序未有舍序而自
為之說者惟宋歐陽公王荊公諸先生出卓然有見

高視千古之上舍序舍傳而研究經旨理明義精犁
然允當如唐之啖助趙匡陸淳舍傳言春秋非尋常
識見所及夾漈鄭樵氏漁仲之言曰風土之音曰風
朝廷之音曰雅宗廟之音曰頌且為作詩辨妄六卷
詩經之旨大明迨晦庵朱子而大定矣益謂去古未
遠有古書可攷莫若漢儒之毛氏傳鄭氏箋制度述
作物性名件莫若唐孔氏之疏義讀此經者所當徧
知而不可偏觀也

詩之音則後魏太常劉芳有毛詩音證梁徐邈等有
毛詩音後徐氏音亡而陸德明之音所引多本於徐
氏德明名元朗以字行德明吳人故多吳音

孔穎達唐書孔穎達字仲達冀州人歐陽文忠公集
古錄跋尾云孔穎達碑于志寧撰傳云字仲達碑云
字仲達穎達撰毛詩正義 繚戾碎破繚音了戾力
結切繚戾乖戾不順之貌

周南關雎 后妃文王未嘗稱王太姒亦未嘗稱后

序乃後人所作不害為追稱之辭 身脩故國家天下治取南豐曾氏說曾氏名鞏字子固南豐人謚文定南渡後改謚文清 有關雎麟趾之意然後可以行周官之法度此程伯子明道先生之語關雎麟趾仁厚之意周官法度周公六典太平之書 關雎為二南正風之首文王盛時之詩也論語曰關雎之亂洋洋乎盈耳哉亂謂卒章也正考甫校商之名頌十二篇於周太師以那為首其輯之亂曰自古在昔先

民有作溫恭朝夕執事有恪韋昭曰輯成也凡作篇章義既成撮其大要以為亂辭詩者歌也所以節舞者也如今三節舞矣曲終乃更變章亂節故謂之亂也史記曰關雎之亂以為風始鹿鳴為小雅始文王為大雅始清廟為頌始大序所謂是謂四始詩之至也為毛氏之學者宗之而齊后蒼為齊詩魯申公為魯詩燕韓嬰為韓詩此三家者皆以關雎為康王政衰之刺詩故有本諸衽席而關雎作之說揚雄謂周

康之時關雎作習治也習治則傷始亂也杜欽傳曰
佩玉宴鳴關雎嘆之臣瓚曰此魯詩說也後漢明帝
詔曰昔應門失守關雎刺世薛漢韓詩章句曰今內
傾于色故詠關雎記淑女以刺時魯韓之說大抵皆
然或者以序有哀而不傷之文疑其容有此理朱子
斥之而以儀禮正之是以儀禮鄉樂鄉飲酒之樂房
中之樂后夫人房中諷誦以事其君子之樂 漢廣
蘇氏例取首句而去其下文蘇氏謂眉山二蘇東

坡穎濱兄弟兄軾子瞻文忠公弟轍子由文定公蘇
黃門有詩傳東坡有說蘇傳之例如云漢廣德廣所
及也例取序之首句宋朝有丘鑄者著周詩集解亦
取小序首一句以為子夏作下文則削之因附見于
此

召南鵲巢 諸侯蒙化成德其道亦始於家人即周
南關雎身脩而國家治之意 何彼穠矣 車乘厭
翟勒面纁總服則褕翟翟車貝面組總有握按周禮

春官巾車掌王后五路重翟厭翟安車翟車輦車凡
五重翟后從王祭祀所乘之車厭翟后從王賓饗諸
侯所乘之車婦人車皆坐乘有容蓋容謂幢容蓋謂
蔽蓋幢容即衛風氓詩之帷裳蔽蓋即衛風碩人之
翟翟翟音狄雉也字亦狄皆訓為雉凡雉具五色者
謂之翟禹貢羽畎夏翟爾雅伊雉而南素質五色皆
備曰翬江淮而南青質五色皆備曰繇繇音遙鄭康
成周禮內司服註作搖周禮禮記或作揄或作榆並

音遙而訓雉與翟狄訓雉義同重平聲直龍切重翟
謂重翟雉之羽厭入聲於涉切厭翟謂次其羽使相
迫厭翟勒回續總者厭次翟羽使相迫蹙以為車之
蔽弗又以如玉龍勒之韋為馬之當面飾謂之勒面
皮之熟者為韋馬之當面飾者為錫錫音洋飾在馬
額亦謂之當盧重翟有錫厭翟次于重翟故云勒而
續畫文也總以繒為之著于馬勒直兩耳與兩鑣馬
銜外鐵為鑣亦謂之扇汗亦謂之排沫以畫繒為總

故云績總著直略切五路之四曰翟車則王后乘以
出喪之車也巾車云翟車貝面組總有握鄭氏註云
翟車不重不厭以翟飾車之側爾貝面貝飾勒之當
面也有握則無蓋矣如今駟車是也駟薄經切今謂鄭
氏東漢時也有握之握馬融作帷幄之幄服則褕
翟周禮天官內司服掌王后之六服褕衣揄狄闕狄
鞠衣展衣緣衣狄翟同褕音揮褕衣畫翬揄音搖
揄翟畫搖雉闕翟刻而不畫展與檀同音戰緣與祿

同音豕后從王祭先王則服禕衣從祭先公則服揄
翟從祭羣小祀則服闕翟三者皆王后之祭服刻繒
為翟之形或畫或不畫綴於衣以為文章也禕衣為
盛揄翟次之重翟為上厭翟次之厭翟之車揄翟之
服此其為下王后一等而為雖則王姬亦下嫁于諸
侯之車服也 騶虞 汲冢周書王會篇云騶虞白
虎黑文西方之獸歐陽公詩本義引賈太傅之說騶
為文王之園固未可据然虞為司獸不為無理書傳

言虞多為掌山澤之官伯益作虞遠自舜世周禮分
為虞衡屬之夏官司馬至如今時京師有仁虞監取
正詩序之義而掌畋獵之事焉陳鵬舉少南氏引禮
記騶虞為節樂官備按周禮夏官射人王以六耦射
三侯樂以騶虞九節鄭司農衆謂析羽九重鄭康成
玄謂奏樂以為射節之羞康成說是禮記射義天子
以騶虞為節騶虞者樂官備也謂歌騶虞之詩以為
射之節度古者射必四矢歌用四節如騶虞九節則

先歌五節以聽後歌四節以射歌一節則發一矢必發乘矢而後卒矢射齊風猗嗟之四矢反兮大雅行韋之既挾四鍤是也騶亦官名騶官虞官皆有人故云官備射義又曰天子以備官為節

邶 頃公賂王請命 衛康叔之後武王同母弟康叔名封受封之國傳康伯考伯嗣伯康伯靖伯貞伯頃侯凡八君頃侯者貞伯之子也厚賂周夷王夷王命衛為侯康音捷頃侯子釐侯釐亦作僖釐侯太子

共伯餘餘蚤死弟共伯和立是為衛武公 溫柔敦
厚之教 禮記經解篇孔子曰入其國其教可知也
溫柔敦厚詩教也故詩之失愚溫柔敦厚而不愚則
深於詩者也益聞諸說者云溫柔而敦厚姿質淳厚
之人也淳厚者未必深察情偽故有愚之失 莊姜
戴嬌 衛莊公名揚娶齊女曰莊姜無子陳女厲嬌
之娣戴嬌生子完是為桓公齊女姜姓陳女嬌姓婦
人從夫諡故因莊公而為莊姜厲與戴亦皆諡 桓

公州吁嬖妾之子州吁弑桓公完而自立石碯之
子厚與州吁游從州吁朝陳將使陳侯請于天王石
碯使告于陳曰衛國褊小老夫耄矣無能為也此二
人者實弑寡君敢即圖之陳人執之而請蒞于衛遂
殺州吁石厚衛人立桓公之弟晉是為宣公左氏曰
石碯純臣也惡州吁而厚與焉大義滅親其是之謂
乎篡弑之賊必討不宥入春秋之初石碯其知大義
矣孔子之春秋為誅亂賊而作是故春秋成而亂臣

賊子懼 奪黎氏地 赤狄潞氏奪黎氏地見春秋

宣公十五年左右氏言潞子嬰兒之夫人晉景公之姊

酆舒為政而殺之晉伐狄數

音上狄五罪奪黎氏地亦

其一晉殺酆舒略狄土立黎侯而還 衛宣公 上

淫曰烝衛宣公上淫于庶母夷姜而生急子急亦作

伋為

音去

伋娶齊女而自取之是為宣姜生壽及朔宣

姜寵而夷姜縊及新臺二子乘舟之詩作風大變矣

二南正家之本身脩故國家可治變而至於如是人

道或幾乎滅息悲夫

鄘 譙 譙讓質責譙才笑切與誚同以言辭相責也 中聲 荀卿子曰詩者中聲之所止也註云詩謂樂章所以節音主乎中而止不使流淫春秋傳曰中聲以降五降之後不復殫矣

衛 從王伐鄭 春秋桓公五年蔡人衛人陳人從王伐鄭王周天子桓王也天子之兵有征無戰鄭祝聃射王中肩鄭莊公使祭

音備足勞

去音

王且問左右敢

抗王師恭而無禮鄭莊之罪有不容誅寔為厲階之
首人紀殆絕重可悲夫經書蔡人衛人陳人從王正
君臣名分之辭也 十曰多昏 周禮地官大司徒
以荒政十有二聚萬民一曰散利二曰薄征三曰緩
刑四曰弛力五曰舍禁六曰去幾七曰青禮八曰殺
哀九曰蕃樂十曰多昏十有一曰索鬼神十有二曰
除盜賊散利謂貸種食弛力謂息淫役舍禁謂公無
禁利去幾謂闕市不譏青禮謂殺吉禮殺哀謂省凶

禮蕃樂謂閉藏樂器而不作多昏謂不備禮而取婚者多也按凶荒之歲每言多婚蓋欲使之相依為命耳

王 王周天王 平王名宜臼幽王宮涅之子桓王名林平王之孫莊王名佗桓王之子皆東遷後之主鄭父子司徒 鄭桓公名友周厲王胡之子宣王靜之母弟為幽王司徒其子武公名掘突為平王司徒 甫田鄭氏 鄭漁仲名樵其居夾潞水自號夾潞

道德高邵學博而雅大儒也宋高宗時人 公子素

孔穎達曰文公捷厲公子春秋閔公二年冬十二

月狄入衛鄭棄其師衛在河北鄭在河南恐其渡河
侵鄭故使高克將兵于河上禦之公子素作詩以刺

之子皮子產 鄭穆公七子謂之七穆公子喜字

子罕七穆之一也子罕之子子展子展之子子皮以

王父之字為罕氏公子發字子國亦七穆之一也子

國之子子產子產之子子國參以王父字為國氏子皮

子產鄭大夫之賢者 帥師 帥師之帥作入聲讀
入聲者如字將帥之帥圈去聲 公子五爭鄭昭公
名忽鄭厲公名突孔穎達曰魯桓十一年祭仲立突
而忽奔衛一爭也十五年突使祭仲堵雍糾殺祭仲
仲知之殺雍糾突出奔蔡忽復歸鄭二爭也十七年
高渠彌殺忽而立公子疊三爭也十八年齊人殺子
疊高渠彌祭仲逆子儀于陳而立之四爭也魯莊十
四年傳瑕殺子儀而納突五爭也

講師 漢儒尚專門之學各講授其師之說故有講
師之名人各異師師各異說經之本旨反因之而亡
呂伯恭氏所謂從而附益之此講詩講經之弊也然
亦有互相發明者不可一槩而論故近世李性學先
輩有繼序之說大序小序之下以經生講師所述者
為繼序性學著詩統一編有自序詩統有曰詩者聖
人傳心之正印而五經之靈樞也士欲學道必自詩
入經燬于秦惟詩以詠免漢裂而四魯固齊陋韓龐

惟毛以爾雅傳又曰至隋而王文中氏始窺其門至
宋而歐陽氏蘇氏始撤其藩觀其堂室明道氏伊川
氏橫渠氏發其郤啟其鑰詩之真隱而復豁紫陽氏
觸其結解其紛而詩之靈明公大中正純粹之天乃
昭昭 李先輩之自序此其大畧然詩統每篇之首
各有小序蓋雪山王氏夾漈鄭氏子朱子之外言詩
者率以序言非愚益所敢妄議也

唐 不謂之晉而謂之唐初不為此 叔虞封唐侯

其子變以晉水所出改為晉晉之為國蓋以水得名
晉武公 史記晉世家晉侯緡立二十八年曲沃
武公伐晉滅之盡以其寶器賂周僖王春秋左傳王
使虢公命曲沃伯以一軍立為晉侯實魯莊公之十
六年也武公弑君篡國大逆不道乃王法之所必誅
而不赦者朱子自附於春秋之義以正人心以誅亂
賊於小序深辨之辭嚴義正武公之罪暴不可掩愚
所謂大節目者於是乎在矣其後六卿分晉併歸于

三而威烈王命魏斯韓虔趙籍為諸侯篡奪強僭之
臣天誅不加而寵秩命之王綱於是而自紊政柄以
是而下移正人紀立人極者不可復言矣嗚呼悲夫
晉獻公 名倮諸武公之子

秦 非子事周孝王養馬於汧渭之間孝王封為附
庸而邑之秦此嬴氏有國之始也非子封秦造父封
趙因附見羅長源趙氏國姓紀原之說羅長源泌曰
氏族之興所繇來遠矣自一姓以上推而至于有國

有家者均不可不原其所自來也太史公作堯舜本紀謂其源皆出於黃帝後世目為良史唐史臣作世系表先宗室而後宰相後世指為全書恭惟國家列聖相承太祖太宗以英睿定大業真宗仁宗以忠厚守成憲高宗孝宗以謨斷成中興之功而趙氏得姓之因歷諸儒討論猶莫之核議者徒見史記所載程嬰杵臼之事遂以為趙氏得姓之始於此而不知其不止此徒見左氏所記趙朔趙武之事遂以為趙氏

得姓或繇於是而不知其不止是徒見史傳所謂造父以徐方功封於趙城為趙氏及張說氏族對以韓陳魯衛許鄭若魏與趙氏並無遂又以為趙氏得姓以國而不知其亦不止於國也嗟乎處劉漢之朝而不知劉氏之為堯後居李唐之世而不知李氏之為少昊裔者考訂有所未到趙氏得姓之繇例推援為造父之後抑不知夏氏之季已有諱梁字者見於正史則趙氏得姓其不止于造父也明矣商氏之初有

諱隱字者官為牧師則趙氏得姓其不止于造父也
審矣百家諱風俗傳易緯書氏族譜俱言張王李趙
皆黃帝之所賜姓抑又知趙氏得姓其不止于造父
也亦較然矣按此于詩傳雖無所繫宋氏有國其姓
亦當知故通之 穆康 秦穆公名任好康公名瑩

陳 陳佗以亂賊被討見書于春秋 魯隱公六年
傳書五父五父陳公子佗也父音甫桓公五年陳侯
鮑卒陳亂文公子佗殺子免而代之免音問六年蔡

人殺陳佗魯莊公二十二年傳云陳厲公蔡出也故
蔡人殺五父而立之桓公名鮑厲公名躍史記以佗
為陳厲公躍為陳利公陳杞世家云桓公鮑卒桓公
弟佗其母蔡女故蔡人為佗殺五父及桓公太子免
而立佗與春秋傳異

曹 昭公名班僖公名夷子共公名襄昭公之子

幽 金縢 金縢之匱藏卜書之匱以金縢緘之

奄 奄商奄二國名商奄之君附紂子祿父周公踐

祚伐之又有魯奄之奄然與祿父所封相遠

謹按周南召南邶鄘衛王鄭齊魏唐秦陳鄆曹豳十
五國地周南則河南洛陽之境其地屬汴梁河南省
周天子之王城陳鄭檜之三國皆河南省地名南則
上接京兆陝西省境江漢則河南及武昌湖廣省境
也其邶鄘衛曹皆在河北唐在河東則上隸中書都
省齊魯山東之地亦隸都省豳秦則陝西省之地也
豳豳之境則和林城嶺北省之地西戎則甘州甘肅

省之地東海則高麗鎮東省之地醫無閭山則懿州
遼陽省之地江之發源則成都四川省之地荆楚羣
舒則湖廣河南及隆興江西省之地太伯適吳則杭
州浙江省之地也中慶雲南省漢以前不與中國通
其地蓋西南夷耳以九州言之直隸都省河北東魯
皆冀州兗州之地齊為青州之地河南省之地為徐
為荆為豫湖廣江西江浙之地為揚陝西之地為梁
為雍河東則并州之地遼陽則營州之地開平大興

和林省則幽州之地甘肅雲南時皆荒遠高麗箕子
朝鮮之域與遼陽壤地相接然此亦槩言之地形如
犬牙相入故不截然整齊也以星土言之大梁之次
州曰冀壽星之次州曰充玄枵之次州曰青降婁之
次州曰徐星紀之次州曰揚鶉尾之次州曰荊大火
之次州曰豫實沈之次州曰益益州與梁州同分野
沈音審或云與沉同鶉首之次州曰雍析木之次州
曰幽姬訾之次州曰并以分野之星言九州者如此

詩之十五國風之地古九州內之地也而其地形皆
陘隘今自都省行省所轄各道各路郡縣處所有古
所未有之幅員不可與十五國同論然以輿地形勢
觀之今天下即古天下今山川即古山川但有通未
通闕未闕之分初無古今之異愚因以贅茲說

小雅 鹿鳴 賓 序詩者言羣臣嘉賓忠臣嘉賓

必君為主臣為賓孔穎達引燕禮客為賓宰夫為主
之說又云君設酒肴羣臣皆在君為主羣臣為賓當

以後說為是 棠棣 國語春秋傳皆左丘明作謂

國語為春秋外傳丘明姓左名丘明與論語左丘明

不同 富辰畿內諸侯為王朝卿士富其采邑也

周文公即公旦名穆公名虎宣王時人 天保 與

鹿鳴相似蓋謂序得詩意但未盡其用耳 南陔

笙詩 笙中吹其詩故有聲無辭如俗中以簫笛吹

歌曲得一曲之譜則此曲之類皆此聲不必求其歌

曲之辭 六月 鄭譜 鄭康成詩譜分別時世必

以某詩為當某王之世 此下不出詩篇名 世本

世本紀氏族譜系之類宋衷為之註釋 譙周

周蜀漢人 脫簡 古者以韋編汗青之竹為簡用

以寫書歲久而所編之韋皮斷爛故有錯簡脫簡之

謬誤 漢魏樂府 漢武帝云歡樂極兮哀情多少

壯幾時兮奈老何魏武帝云對酒當歌人生幾何譬

如朝露去日苦多

大雅 文王 歐陽文忠公論曰書泰誓十有一年

說者因以謂自文王受命九年及武王居喪二年并數之爾是以西伯聽虞芮之訟謂之受命以為元年此妄說也古者人君即位必稱元年常事耳不以為重也後世曲學之士說春秋始以改元為重事然則果常事歟固不足道也果重事歟西伯即位已改元矣中間不宜改元而又改元至武王即位宜改元而反不改元乃上冒先君之元年并其居喪稱十一年及其滅商而得天下其事大於聽訟遠矣又不改元

由是言之謂西伯以受命之年為元年者妄說也後之學者知西伯生不稱王而中間不再改元則詩書所載文武之事粲然明白而不誣矣 東坡蘇文忠公曰昔漢高祖擊滅項籍統一四海諸侯大臣相率而帝之終且辭以不德惟彼陳勝吳廣乃囂囂乎急於自王而謂文王亦且為之耶武王伐商師渡孟津會于牧野其所以稱君之命命于諸侯者蓋猶曰文考而已至於武成既以柴望告天百工奔走受命于


周而後稱曰我文考文王克成厥勲由是觀之則是武王不敢一日妄尊其先君而況于文王自王乎

廣平游氏定夫曰武王於泰誓三篇稱文王為文考至武成而柴望然後稱文考為文王游氏又曰禮記大傳載牧野之文追王太王亶父王季歷文王昌亦據武成之書以明追王之意出於武王也世之說者因中庸無追王文王之文遂以為文王自稱王豈未嘗攷泰誓武成之書乎君臣之分猶天尊地卑紂未

可去而文王稱王是二天子也當六國之時辛垣衍
欲帝秦魯仲連以片言折之不敢復出口蓋名分之
嚴如此曾謂至德如文王者反盜虛名而拂天理乎
亦雀丹書此讖緯之說不足取信如云有火自上
復于下至于王屋流為烏其色赤之類是也漢儒解
經多惑讖緯既已近誣而靈臺一詩乃追述文王之
事遂以為天子之制其誣甚矣

周頌北郊集議 宋元祐八年禮部尚書蘇軾言古

者合祭天地以為祀上帝則并祭地祇歷舉漢魏及
唐合祭之說其第轍亦同其議諸家皆言南郊圓丘
冬至祭天北郊方丘夏至祭地此蘇氏北郊集議之
說也詩序未終姑綴于此者望來者云



詩傳旁通卷十五